



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

Smart classroom dang nungibo
smart tesayur tongtibangba

Badminton World Sr Championship
nung Bendang Jamir-i shilem agitsü

VOL. XXII ISSUE NO. 323 (ADOK 323) DIMAPUR KÜPTOKNÜ (SATURDAY) RONGJUI (SEPTEMBER) 06, 2025 ₹ 5.00

Tuli Paper Mill atema sorkari luden ka tentettsü

Dimapur, September 5, 2025

(TYO): Tuli Paper Mill dak sendakba tebilemtsü atema luden ka tenteta reprangshimtsü ta Chief Minister Dr. Neiphiu Rio-i Brihostibarnü metetdaksüogo.

Brihostibarnü State Assembly monsoon session tembangba anogo nung MLA Nuklutoshi-i Tuli Paper Mill atema asüngdangdang CM Rio-i iba telangzüba agütsü.

MS 3A Capital Services nem petroleum, natural gas aser coal mapa inyaksü temelaba agütsüba olulutem angazüker ta Nuklutoshi-i ashi.

Idangji Rural Development Minister Metsubo Jamir-i ibala tenangzüktep kecha mali saka company-i ethanol production atema temelaba meshia lir ta ashi.

Department of Industries-i tanga department den asüngdangtepa iba onük ya asadangdar ta Metsubo-isa ashi.

"Ali rongsen agitettsüba ya Geology and Mining aser Land Resources department tem den sendaktepba onük ka lir. Parnoki sorkar dangi abentsü aser asenoki iba onük asadangtsü" ta paisa ashi.

Paper mill workers' union aser company tsüngda itasen atema mangatettep ken o tem adoka lir aser iba atema 2024-25 nungi state sorkar medeni sendentem mena arur. Company-i itasen 57% agütsütsü ashi saka mapa inyaktertemi 85% meshir ta MLA Nuklutoshi-isa metetdaksü.

Tuli Paper Mill ya tang Mumbai nung amenoka aliba MS 3A Capital Services Limited meyong lir. State sorkari tentetba luden ajanga iba company ajanga koba tashi

mill repranger meyipa reprangshitsü aser mapa inyaksü atema telatet ka agütsütsü.

Tesüiba nung Hindustan Paper Corporation Limited (HPCL) dak teimla ayu saka tamakok dang ajuru. HPCL-i parnoki adokdaksüba khuretem mekottetba dang masü saka November 7, 2023 nü MS 3A Capital Services Ltd. ket nung Tuli Paper Mill agütsü ta CM Rio-i ashi.

"Küm ana süiaka kibur tasen den tenangzüktep sign asüba kecha mali aser iba jagi parnok kechi tangatetba nung iba mapa inyak mejangjar. Sorkari luden ajanga iba tebilemtsü jungjunga asadangtsü aser nungdakra HPCL anema ozüngi melaba ama inyaksü" ta paisa metetdaksü.

Nübertem kanga timtemer aser iba atema sasaa bilemtsür. Tuli Paper Mill dak sendakba ken o tekaratiba nung angatetteptsüla ta CM Dr. Rio-isa ashi.

3A Capital Services Ltd.-i November 7, 2023 nü Nagaland Pulp and Paper Company Ltd (NPPCL) nung 96.49% alizük aser state sorkar shilem 3.5% lir ta pai tezüluba nung agütsü.

Company tasenbai mezüngbo paper mill tanaben shia arutsü ashi saka lia arudang rongsenketzüng lenmang tesademba angutsü atema ethanol production atema tebilemba shiogo ta CM Rio-isa ashi.

Nagaland state aser nübertem atema tajangzüik dang bentsür arudi ta süra sorkari tebilemba tasentem agizüksü mulunga lir. Sorkar aser company tsüngda tang draft agreement ka reprangtepdar ta paisa metetdaksü.

Mokokchung okadaki tanur tetsü aitsü

Dimapur, September 5, 2025 (TYO): 2019 küm Mekuli yimtsüng nung tanur ana tepsetba atema okadaki tanur tetsü aitsüogo.

Principal District and Sessions Judge, Mokokchung Victo Sema, NJS-i tanur ana tetsü Imjunglemla aitsü ta Assistant Public Prosecutor M Temjenwathy Imsong-i sangdong ka nung metetdaksü.

Arishi küm 3 aser arishi küm 1 ta tanur ana tepsetba

atema Indian Penal Code (IPC) nung Section 304 Part-I aser Section 309 IPC kübok tai tonglokja alir aitsüsa kuli ngutetogo ta August 28, 2025 nü okadaki obendang agütsü.

Okadaki Imjunglemla culpable homicide atema küm 10 aser sosettsü merangba atema küm 1 tepuokdak ayutsü obendang agütsü.

2019 küm Mekuli yimtsüng nung Imjunglemla-i lar tanur ana tepsetba sülen la taküm agitsü meranga liasü.

Nagaland nung education system kanga junga melenshitsü: CM Dr. Rio



Kohima, September 5, 2025

(TYO): Nagaland nung education system ya linük aser alima jenjang menepa akümtsü atema temelenshi aika bener arutsü ta Chief Minister Dr. Neiphiu Rio-i metetdaksüogo.

Kohima nung State level Teachers' Day benjung amungdang CM Dr. Rio-i education sector akangshitsü, ajak dendaktsütsü aser tarutsü atema renemtsü atema sorkari merangba nenshia metetdaksü.

Sorkari inyakba mapatem rongnung SOAR Mission (Systems for Outstanding Achievements and Reformation) dena lir. Iba ajanga teaching quality, assessment standards, aser school management jenjang temabai ajungkettsü. SOAR Mission ajanga temelenshi tajung bener arutsü ta pai ashi.

National Education Policy (NEP) 2020 den putepa Nagaland State School Standards Authority (NSSSA) amenokba

ajanga school ajak asadangtsü. Iba den yariteptsü atema Nagaland School Quality Assessment and Assurance Framework (NSQAAF) latettsü ta Dr. Rio-i ashi.

Sorkarisa Nagaland University den yaritepa tetsü oshi nung ajemdaker shisaliok agütsütsü aser iba ya lisopur oshitem ajungkettsü aser language teachers ajitettsü atema lir ta Rio-i ashi.

Department of TaFMA den amalitepa elementary level nung music education dendaktsütsü sentong lir. Ano, Department of Social Welfare den lokteper foundational stage education tashi itdaksütsü ta paisa metetdaksü.

NEP 2020, SDG-4 on Quality Education, aser NIPUN Bharat Mission den külemi item maparen ajanga Nagaland nung education system kanga junga akümtsü ta Dr. Rio-isa ashi.

"India nung most literate state tasembubaji Nagaland lir aser iba atema nüma atanger. 1963 nung

asenok state angudak literacy rate 21.95% liasü saka tanübo 95.7% tongogo" ta paisa metetdaksü.

Iba ya tesayurtem, asalentong asürtem, aser shisaliok lennirtemi bendanga agüja inyakba ajanga atongba lir ta Rio-i ashi.

Nagaland nung pupil-teacher ratio of 13:1 lir aser iba ya national average dang nungi kanga agi tajung lir, ta paisa ashi.

School Leadership Academy of Nagaland (SLAN)-i küm ana atongtepa national award angubua atema tenüngsang agütsü. School tekolakpurtem aser tesayurtemi in-service training aser leadership development maongkatem agitsü ayongzüker ta Chief Minister Rio-i ashi.

"Tesayurtem ya loktiliba tongtoret lir aser nenoki maneni kaketshirtem nem shisatsü, aria bilemba aser metetnüba tangatetba lidakjang" ta pai ashi.

(Maneni tapak 8 nung...)

Peleno Petenilhu-i National Teachers Award 2025 agizük

Dimapur, September 5, 2025

(TYO): John Government Higher Secondary School, Viswema, Kohima nung tesayur Peleno Petenilhu-i National Teachers Award 2025 anguba ajanga Nagaland nung tesayurtem aser state asoshi konang nüngsang bentsür aruogo.

September 5, 2025 nü Vigyan Bhavan, New Delhi nung sentong ka nung Peleno den külemi linük kübok tesem balala nungi tesayur 65 nem tetushi agüja liasü.

India nung tesayur million 9.8 shi lir aser iba nung sorkar school tesayur million 4.88 aser nija school tesayur 3.54 (2021-22 UDISE+ data) dena lir.

Tesayur aika rongnung Peleno-i iba sempet anguba ya lai kanga bendanga agüja inyakba ajanga lir. Küm 20 tema tesayur ama inyaka arudang lai kaketshir aika anitetogo aser tajung kümdaktsüogo.

Peleno-i mezüng Government



High School Seikhazou nung tesayur inyaksü tenzük aser 2014 nungi John Government Higher Secondary School, Viswema nung inyaka arur.

Lai "Education with Empathy, Leadership with Purpose" tangatetba nem len anidaktsür inyaka arur aser lai mapa tajung ka inyakbaji "Each One Teach One" lir. Iba mapa nung Class 12 kaketshirtemi parnok kübok aliba sensaker kaketshirtem sayudaktsür.

Iba mapa ajanga tangazükertem tashi itdaksüba

dang masü saka Class 12 kaketshirtem dak-a lenisüba aser aria bilemba tangatetba agütsür.

Peleno atema tesayur mapa inyakba ya mapa ka dang masü saka arishi piyong mission ka ama lir. Lai kaketshirtem school züngtor manendaktsünür, ki sema senzür, admission fees teyari agütsür aser makamait kibongtem nungi kaketshirtem nembo mobile phones dena alia agütsür.

Peleno ya Kohima district nung English Professional Learning Community (PLC) President lir aser lai külem tesayurtem den amalitepa inyaksangshir.

Laisa ABHYAAS Learning Management System (LMS) atema e-content yanglua digital education nung shilem agiogo aser DIKSHA platform atema lesson plans yanglur.

Peleno-i bendanga agütsüba aser mapa tajung inyakba ajiteta 2024 nung State Teacher Award agütsüogo.

Mokokchung nung Tesayurtem Anogo sentong aka



Mokokchung nung 64th Teachers' Day sentong agia District Teachers Award 2025 agütsüba sentong temer kelen Mokokchung DC Ajit Kumar Verma, IAS (abelen nungi anabuba), senpet agizükertem, DEO Mkg aser Sr. SDEO, Mkg. nunger külemi tangokba noksa.

Mokokchung, Rongjui/September 05 (TYO): Mokokchung nung tanü District Education Officer Office Conference Hall nung 64th Teachers Day sentong agia District Teachers Award 2025 agütsüogo.

Mokokchung nungi taküm District Teachers Award-2025 agizüker parnok pezü - Dr. Mereninla Panthy Jamir PGT GHSS Tuli, I.Tsükjempokba GT Mayangnokcha GHS, Imkumzuba Head Teacher GMS Nokpu aser Alemyanger Aier Teacher Incharge GPS Changtongya Yimsen - liasü

aser parnok nem Mokokchung Deputy Commissioner, Ajit Kumar Verma, IAS ajanga senpet agüja tushi.

Sentong nung Mokokchung DC, Ajit Kumar Verma-i mapang tatsüka agia jembidang tesayurtemji nisung ka taküm arishi tepeyong liyonga aotsü asoshi shilem tajung agir kaka lir, anungji tanü anogo ya nenok mapa tajung asoshi tenüngsang agüja tushiba anogo lir ta ashi.

Tesayurtemji alima tejakleni anir aotsü tongtipangtiba nükmen lir, anungji nenoki nenok tenzükbaji angateta tenzükra ne taküm nung temoatsü akatsü

aser aji alima asoshi teyari tulu asütsü, ta Mokokchung DC-isa tesayurtem ayongzüka jembi.

Sentong nung Tsüngrem leniba jazüka DEO, Mkg. Head Asst. Imlitola-i sarasadema tenzüker aser senpet agizükertem tenüng nung Dr.Mereninla Panthy Jamir PGT GHSS Tuli-i tepela o jembi, DEO Mkg. Sentinenla aser Sr. SDEO, Mkg. Tarepkaba tenati shilem agia jembiba den sentong shibanga DEO, Mkg UDA Mayangnaro-i sarasadem aser District Project Asst., NECTAR-The Lighthouse Temsusenla Jamir-i sentong ketdang asü.

BJP Nagaland state asendenshi sentong agi



Dimapur, Rongjui/Sept. 05 (TYO): Tanü BJP Legislature Party lenir Y. Patton-i party workers tem dang külemi temulung agüja inyaksü ayongzüker aser Nagaland nung BJP-i yimsü asütsü mapang tongogo ta ashi.

Hokulbarnü Town Hall, Dimapur nung BJP Nagaland state executive meeting-cum-organisational workshop nung jembidang, künu anogo Narendra Modi lenisüba kübok Nagaland nung BJP sorkar ya lidaktsüner, ta Deputy Chief Minister Y. Patton-i ashi.

BJP ya tang state nung ruling government den alliance partner lir, aser temaba jenjang asoshi nükjidadong ayutsü mapang ka ama bilemer, ta ashi.

"2028 state elections nung BJP-i assembly constituency 60 prongla nung tokteptsüla. Dangar den menden lemsatapa mapang kobika tokteptsü?" ta

Y. Patton-i ashi.

Pa mezüng BJP ticket nungi 2008 küm shim aser iba mapang party-i menden ana nung kisüng takok angu, ta ashi.

2018 küm NDPP den 40:20 seat-sharing formula nung BJP-i menden 20 nung toktep aser 12 nung talok angu aser NDPP-i menden 40 nung toktepba nungi 18 nung takok angu. 2023 nunga BJP-i candidates 20 toktepdaktsü aser ano 12 nung takok angu.

BJP menden 12 alema maotsü atema party telungzüker nung pangzüng kar ali asü koda, ta pai asüngdang.

Patton-i BJP karyakartas temi inyakba pela agizüktsü aser parnok den yariteptsü tongtipang ta ashi aser parnok mechi tanü asenok iba jenjang nung lir ta ashi.

Pai elected members tem dang pei constituency kija nung masü saka assembly constituency 60 prongla nung

item nübutem anepalua amshitsü ajungshia liasü.

Pai party workers tem dang nüngsen-pangsen yutsütsü aser tarutsü nung Nagaland nung BJP sorkar ka amenoktsü arok nükjidadong nung takok angutsü asoshi külemi inyaksü ayongzüker.

BJP Nagaland state tir Benjamin Yephthomi-ia iba sentong nung jembidang, ibai teti amenba senden ka ama masü saka tesüiba mapang lepa reprangshiba, asendenshiba aser Nagaland nung aliba nüburtem bendanga agütsü tenzüksü asoshi tali pangjemshiba mapang ka lir ta ashi.

Nagaland tesem ajunga nung Bharatiya Janata Party lidaktsütsü, nüburtem nem tamang katetdaktsütsü aser Ato Kilonser Modi indang Viksit Bharat 2047 mangdang nung Nagaland-i shilem tulu agitettsü asen mapa lir, ta pai ashi.

Kangtsung Watsu Telen-i aitsür

Dimapur, Rongjui/Sept. 05 (TYO): Arishi küm 65 tain Rongpangkangzuk Kangtsung (S/o Lt. Subenzuba Kangtsung) ajanga August 30, 2025 nü jala arishi küm 7 tanur ka dak tim masüba tashiyim mapa inyakba asoshi khukua aitsür, ta Kangtsung Watsu Telen

sangdong ka ajanga ashi.

Anungji ozüng amertemi aibelener nem kecha tebandang meli-i tapet temerenshi agüjang ta ozü Kangtsung Watsu Telen ajanga akhanger, ta Tir Wt. Limanaro Lkr aser Tongti Zülur Wt. Sentiyanla nati sangdong ka ajanga metetdaktsüogo.

Mozüki yangluba maparen shidak inyakang: OKM

Dimapur, Rongjui/Sept. 05 (TYO): Mokokchung district kübok Sabangya nung 50 bedded Integrated AYUSH Hospital yangluba maparen nung temulung masütsüsa inyakba aser mapang talangka agiba tebilemtüsü Chungtia Students' Union ajanga lemsatepba nung onok dena lir, ta Ongpangkong Kaketshir Mungdang (OKM) sangdong ka ajanga ashi.

CSU ajanga iba tongtipang ki o jen maparen saksalema mitba aser iba mapa junga meinyakba indang temai adoktsüba asoshi tenüngsang agütsür, ta ashi.

Sen 442.91 lakhs agüja work orders küm trok tejakdang agüjaka mapa shilem 65 shi dang inyakogo aser yangjia temulung masütsüsa inyaka lir.

Asen nübur ajungtsü asoshi bendanga agütsüba lokti tentet ka ama CSU-i 'quality assessments' shidak magi tashi akhangba nung onoki bhusemer, ta OKM sangdong ajanga ashi.

Anogo 10 tsüngta departmental technical

personnel densema Joint Technical Inspection agitsü aser Ultrasonic Pulse Velocity, Rebound Hammer, aser Core Cut Sampling amshia iba ki tendangtsü akhangba nung onoka adener, ta ashi.

Mokokchung district nung aliba nüburtem healthcare facility tajungtiba langa lir. Nisung takum lendongi yoktsüsa aser nübur meyong senotsü amajok nung indokba onoki magizüktsü, ta OKM-i ashi.

CSU-i ochi akhangba nung tim ketdangsüri tasü ita tekeraba nung telangzüba agüja metokmeperi alinungbo yanglushitsü aser junga meinyakba aser mapang tali agiba asoshi tapet mera agitsü ayongzüker.

Iba ken o nung Chungtia Students' Union den onok akang-akanga nokdaka lir aser maneni tensa kanga junga meita alitsü. Stakeholders ajungai nübur tejangraba mezüng südaktsütsü aser tongtipang healthcare ki o jen tajungtiba nung memonui renemdaktsütsü ayongzüker, ta OKM sangdong ajanga ashi.

Kohima nung Mission Shakti Committee senden amen



Dimapur, Rongjui/Sept. 05 (TYO): Deputy Commissioner, Kohima indang office nung September 4, 2025 nü Mission Shakti - Kohima District Level Committee Meeting cum Capacity Building Session mena liasü. Iba senden nung Deputy Commissioner Kohima and Chairman, BBBP (Beti Bachao Beti Padhao), B. Henok Buchem, NCS menden liasü.

Iba sentong nung Neipecha Mepfhuo, District Mission Co-ordinator, DHEW Kohima ajanga BBBP kübok "gender sensitization" indang lemsatepdang, nüburtem nem iba sentong angatetdaktsütsü, scheme nükjidadong, stakeholders teinyaktsü, tetsür chanu kumzüka ayutsü aser tetsür-tebur telemsa samadaktsütsü nüngdakba indang ashi.

Vimenu Richa, Centre Administrator, Sakhi-One Stop Centre (OSC) Kohima ajanga

tetsür-tebur telemsa nung ajemdaker mapa tamajung inyakba indang jembi aser Sakhi-OSC indanga tongmelang agi lemsatapa liasü.

Tetsür anema mapa tamajung inyakba ya shi nung, tekolok shisatsü nung mesüra rongsenketzüng nunga asütsü akok aser 'cyber violence' ya tang tali kumogo, ta lai ashi.

Lai iba sentong nung adenertem dang tetsür anema mapa tamajung inyakba dak sendakba nung tzüzüng-ozüng, Sakhi-OSC shilem aser services agütsüba indang rateta ashi.

Sensaksemba mapang OSC nung mapa tajung inyakba atema Deputy Commissioner, Kohima ajanga tenüngsang agütsü aser tetsür asoshi 'safest city' nüngja agüja aliba ya tatalokba ka ajanga menentsütsü, anungji stakeholders temi maneni tajungtiba nung inyaktüla, ta ashi.

Smart classroom dang nungibo smart tesayur tongtibangba: Tir Murmu



September 05, 2025 nü Vigyan Bhawan, New Delhi nung 'National Teachers Awards 2025' sentong nung linük Tir, Murmu Droupadi-i tesayur ka nem award agütsüdang tangokba noksa nung angur.

New Delhi, Rongjui/Sept 05 (Agencies): Shisaliok rejutem nung smart blackboards, smart classrooms aser facilities tasen dang nungibo smart tesayurtemji tongtibangba, ta Hokolbarnü linük Tir, Droupadi Murmu-i metetdaksü.

Hokolbarnü tesayurtem anogomong sentong nung Murmu-i la tamalen tesayur inyakba bilemteta, tesayur inyakba mapangji la taküm nung tetezü tali aketba mapang ka liasü, ta ashi.

Vigyan Bhawan nung National Teachers Awards agütsüba sentong nung lai tesayur 60 dak tema nem award agütsü.

"Smart blackboards, smart classrooms aser facilities tasenji-a tongtibang, ajisüaka tongtibangtibaji smart

tesayurtem lir. Smart tesayurtemji kaketshirtem renloktsü atema nüngdak reprangtetba tesayurtem lir. Smart tesayurtem ajanga lesson angazükbaji jangratemtsü mapa ka kümdaktsür aser temeim agi sayur," ta lai ashi.

"Item ama tesayurtem jagi loktiliba aser linük nüngdak peridaktsütsüsa kaketshirtem arangshitsür. Nendaka sayuba tesayrutemi tanurtem taküm nung akhümket alitsü sayur aser temelung lemteta alitsüsa sayur," ta lai ashi.

Murmu-i, tanur ka taküm yangerdaktsübaji tesayur ka teinyaktsü mapa tongti lir, ta ashi. "Tetoktepba jangraba kaketshirtem, kaket shisatsü kija dang bushiba aser pei atema dang bilemba kaketshirtem

dang nungibo khuret abenba aser tenendak kaketshirtem tajungba. Tesayur tajung kati kaket shisatsü dang masü saka taküm libaliro junga alitsü atema-a sayur," ta Murmu-i metetdaksü.

"Shisaliok dak aliba tashi ajanga kanga sensaker kibongtem nungi tanurtemia anünglak nung kongshitetsü. Tanurtem anünglen tashi ayimtsü atema tashi agütsüba nung temeim aliba aser tenendak tesayurtemi kanga tongti shilem agir. Tesayurtem atema sempet tajungtibaji-tanurtemi akumli piyong parnok bilemtetbaji lir," ta laisa shisem.

Award sentong jakdang Ato kilonser Narendra Modi-i National Award angutsü aliba tesayurtem ajurua jembia liasü.

GST ajemba ajanga tajangzükji nüburtemi angutsü: Piyush Goyal

New Delhi, September 05 (Agencies): Hokolbarnü Commerce & Industry Union Minister, Piyush Goyal-i, Goods and Services Tax (GST) rates ajemba ajanga tajangzükji nüburtem nem agütsütsü, ta metetdaksü.

Interview ka nung jembidang Piyush Goyal-i, "Sector balala nung industry tulu-tila ajaki tajangzükji nüburtem nem agütsütsü ta shiogo. Onoki imlaba ama parnoki inyaktsü, ta onoki temelung alemer," ta metetdaksü.

Paisa, "India nung nüburtemi Ato kilonser Narendra Modi dak melung lemtetba ama Modi sorkaria stakeholders dak melung lemteter," ta ashi.

GST saru telatet ajemba ajanga saru kanga ajema arutsü tebilemtsü akar, aser iba dak sendakba nung tasüngdangba ka langzüdang Union Minister-i, "Iba atemaji shingaia tebilemtsü makatsüla, ta ni bilemer. Küm ka nung sen 22 lakh crores ji sen ishika dang. Jenjang dalangba akümmba ajanga 'demand' taliba akümmtsü, anungji saru aika sarutettsü ta ni bilemer," ta ashi.

GST saru telatet asem pusema minister-i, "Iba inyakim ashishirtemi India nunger loktli nüngdak junga memetet südi ta ni bilemer. Asen linük nung nübur aikati jenjang dalang osettem nüngdaker. Anungji onoki item ama oset nungji GST rate shilem 5 latet, aser nüburtemi nüngakba osetsüset

aika nung saru shilem 5 dang lir. Ano saru shilem 18 tashi agütsütettsüsa osetsüset kar lir. Ibaji ajanga sensakertemi nüngdakba osetsüset nung saru khuret pungbatsür. Iba dak alia saru shilem 40 aliba chiyungtsütem (sin goods) lir, aser nisung ajaki item ama nungjibo jenjang majemdaktsünütsü," ta pai metetdaksü.

GST kübok 'sin goods' temji yi, moko, sen asayaba, aintokdangba mesüra temo aser shini tali keta aliba chiyungtsütem lir.

Goyal-isa, taküm kümzükba mozü tapu aika nung saru malitsü aser tangbo mozü aika nung jenjang kanga ajema kümogo, ta metetdaksü.

Bendanger puoka ayutsü atema Detention Centre amenoktsü tuyur

New Delhi, Rongjui/September 05 (Agencies): Centre sorkari states aser Union Territories ajak dang kuli kaket tejangja maliba bendangertem pudena ayutsü atema detention centres amenokang, ta tetuyuba agütsüogo.

Immigration and Foreigners Order, 2025 nung ajemdaker Ministry of Home Affairs-i detention centres amenoktsü atema tetuyuba agütsü.

Iba tetuyuba ya taküm April ita nung Parliament nung agizüka liasü.

Immigration and Foreigners Act, 2025 ozüing tasenba ajanga Passport (Entry into India) Act, 1920, Registration of Foreigners Act, 1939, Foreigners Act, 1946 aser Immigration Carriers' Liability Act, 2000 melener.

Iba tetuyuba kübok Centre aser state temi ozüing alema aruba bendangertem maittsü jangjatsü atema mera agia inyaktsü, tayimtsü aser tanga transport balala mita reprangtsü aser melung melemra kiojen

mita aotsü shia lir.

Kulikaket maliba bendangertem maittsü jangjara parnokji mesenzüdaktsüi centre mesüra camp nung pua ayutsü, iba sülen parnok linük nungi meindoktsü atema ketdangsertem nem tetuyuba agüja lir.

Kasa tetuyuba ajanga melung malemertem jaoktsü mesüra tashi mangartem aputsü asoshi

foreigners tribunals nem tashi agüja lir. Tang tashi nungbo Assam nung dang item tribunals-i inyakdar, aser tanga state tem nungbo court temi inyakdar.

Hombarnü Home Ministry-i, court temi nüngdakba nisungtembo India nungi aoba nokdangtsü akok, ta metetdaksüogo. Iba dak alia item ama nisungtem meyipa yokba ajanga bendang linük kar den tesendaktep raksatsüsa süra parnokji meyoktsü metetdakja lir. Item ama nisungtem list ji Bureau of Immigration-i renemtsü.

Punjab nung tzümetsüng lendong nung asürtem 43 jungogo



September 5 nü Punjab kübok yim ka nung sepaitemi tzümetsüng lendong nungi nisung kar rong nung kümzüka anir aoba noksa nung angur.

New Delhi, Rongjui/September 05 (Agencies): Tesüba küm 40 tsüngda Punjab nung tang tzümetsüng lendong tulutiba ajangshidar; tzümetsüng ajanga state kübok district 23 prong kongshiogo aser tang tashi nung nisung 43 süogo.

Punjab nung tzümetsüng lendong tulu ajangshibaji 1988 küm liasü, iba sülen tang tzüngluruwa mongpu nung Punjab nung tzümetsüng lendong tulu ajangshir.

State nung tzümetsüng ajanga nisung lakh 3.5 dak tali kongshiogo aser yim 1,655 nung tzü metsünga lir, ta ketdangsertemi metetdaksü.

District aika nung sepaitemi kümzükba maparen maneni inyakdar. Tzümetsüng aliba tesemtem nungi nisung 20,000 dak tali kümzükogo aser ketdangsertemi teyari nüngdakbapurtem nem chiyungtsü aser mozü densema teyari balala agütsüdar.

Indian Army, NDRF, BSF aser state police-i rong, helicopters aser drones amshia nisung kümzükba maparen maneni inyakdar.

Central team anati Punjab semdanga state nung

teraksatsüba jenjang asadangdar aser Union Agriculture Minister Shivraj Singh Chouhan-ia Amritsar aser Gurdaspur district na semdanga tzümetsüng tensa asadangogo.

Tzümetsüng agi tamajungtiba kongshiba tesemtemji Gurdaspur, Pathankot, Fazilka, Kapurthala, Tarn Taran, Ferozepur, Hoshiarpur aser Amritsar districts lir. Gurdaspur kija nung yim 324 tzü agi metsüngbangogo, Amritsar nunga yim 190 aser Ferozepur nunga yim 111 tzü agi metsüngbangogo.

Ano külen state nung aluyimba li hectare 1,75,216 tzü agi metsüngbangba ajanga alu nung tsük aser aonsotsü sen crore aika jenjang raksatsüogo.

State nung Sutlej, Beas aser Ravi ayongtem nung tzü lendong-bang nung yimdar. Himachal Pradesh aser Jammu & Kashmir na nung tzünglu kanga aruba ajanga Punjab nung tzümetsüng lendong ajangshir.

Relief camp 122 nung nisung meyirjang aika jenokdakja lir. State sorkari teyari agütsütsü atema sen crore 81 lezmüktsü aser medical team 800-i nüburtem yaridar.



Chennai, September 05, 2025: US-i India nunger osetsüset nung saru tali atuba anema Chennai nung Left party tem nungi züngsemtemi US Tir, Donald Trump anema longkak aita jajaba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGJUI 06, 2025

Tuli paper mill melen kechi ?

Nagaland nung Tuli paper mill melena nübortem ajangzüksüsa mapa kabosa tenzüka aotsü nüngdakba reprangteta yashi yakanü Nagaland tatar senden nung ken o benoka jembiba angashia yakta langka tajung kabo ataloktsü amai Naga nungertem nem teimla ka agütsüogo. Aji oda, Nagaland nung, tanga state-tem nung ama, Industries and Commerce department-bo lir, saka Industries kar lapoka aliba ajak sümar, shia marutet, tangbo Nagaland nung nisungtem mapa inyakdak akatsüsa aser Nagaland nung akaba Industries nung yanglutetba nüngdak oset karbo tanga bendang limatem nung ayoktsüsa industry kata maka kümogo. Atangji, Nagaland nung tamalen lapokba industry-tem paper mill, sugar mill aser plywood factory ama takok ngua moutetbaji, talisa, asenok nisungi industry nung inyaksü memetet aser industry yimya meteter-a mali, iba denji industry kiburji government südaktsü, anungji government nung alirtemibo industry mapaji tajangzük ngua inyaka odaktsütsü bilemer masü saka industry nungji pei nisung ita sen chia alitsü asoshi akok tashi aika anioka toktsütsü dang bilemer südi. Ashiko, iba jagi mapa inyakdak industry dak malang mapa inyaktertembo aika saka temulung agüja inyaker mali ta asüba timtema ajurur alitsüa akok. Iba denji ano asenok rongnung industry maparen metetba nisunga mali nungji, Hindustan Paper Corporation Ltd nungi yokba ketdangsertemi inyakba nung shitaka mereprangtet aser taia meputet ta parnok sünütsü südakja inyakdaksüba agi maparen aika nung parnoki asenok meima inyak masü saka tekülakang kanga külaoktsür südi ta bilemer. Ashi, Nagaland kümer küm 10 buba nung 1972 küm Nagaland akümer lenirtemisa Nagaland nunga Tuli nung paper mill ka lapoktsü asoshi center government ajanga HPCL ayongsermer Nagaland government dena külem kibur kümer inyaksü lemtetbaji shisataka aser mangdang tulu yur tenzüka mapa ka liasü. Ajisüaka, Nagaland Pulp & Paper Corporation Ltd ta ser Tuli, tangbo Tzüdikong nung lapokba paper mill ya 1982 küm paper menüngtsü tenzüka anarongdena küm ter menünger 1992 küm shibangadokba, tang tashi paper mill-jia shia marudaktsütet aser iba melena tanga industry-a kata melapoktet asenok kanga akoksadagi. Atangji, government-i lapokba aser reprangba industry, India ama democratic lima ka nungbo takok mengutettsü, kechiyong government meyong osetji ajak meyong amato saka ano shinga meyonga masü amai akümer. Iba jagi government meyong kiojena dena kibur mali amato menenadoker. Iba tangatetba nung tangbo Nagaland nung industry lapokba nung ya government-bo kibur küma madenang shitak saka industry lapokba jagi nübortem nem tajangzük agütsütettsüsa tangatettep ken o kar industry lapoker den renema yur, government-i anüksü aser company jagi inyaksü ta asüba inyakyim nung tang nungibo Nagaland nung industry-tem lapoka aotsüla. Tetezü, government-ibo industry lapoktsü asoshi masü saka industry lapokdaksütsü bilema sentongang tajung aser tapet yanglutsüla. Ashiko, iba tangatetba nung tang nungibo Nagaland government o tang tasenba 3A Capital Services company nati Tuli paper mill-jisa shia marudaktsütetaka, iba melena tanga industry tajung lapoka yakta mapa tenzüksü bilemdar asütsüa akok. Aji oda, tang Nagaland tatar senden nung Tuli paper mill indang benoka jembidang angazükba agi, tasenba company yagi paper mill melena süngküm aser aou agi gari totzü yangluba Ethanol Plant ka amenoktsü tebilemba lir südi. Atangji, linük nung paper mill ya Tuli paper mill dang masü saka aika shibangogo, anungji paper mill takok ngua moutetba tamakokerji asenok kija masü. Ajisüaka, paper mill nung agitsü asoshi arema wazüka ayutsü aser aou aser süngküm lu ayimtsü atema Nagaland government-i ali tuluka küm 99 asoshi alia lir, anungji paper mill melena lapoktsüba industry-jia aou aser süngküm nüngdakba industry ka asütsüla. Ajisüaka Assam nung süaka, Tuli anasa Numaligarh nung tang ita nungi Ethanol industry ka tenzüksüba lir, anungji asenok ket nung akaba arem yagibo asenokang meperitsüsa akümtsü. Ibajia jungjunga bilemdangtsüba mapa ka asütsü. Iba ama sentong tasenji tenzüka otettsü atema, tang tasenba company aser Nagaland government nati NPPCL nung inyaktertem nem parnok angutsü tim aliba sen aser tanga sentsü ajak tama aodoktsüla. Iba tebilemtsü nungi state government majentsüla aser Company tasenbaia mapa tenzüka odi süra memenui tenzüksüla. Aji mesüra, Tuli paper mill melen mapa tasen metenzüketet menuba nung timtem aser takoksa aika ajurutsü.

OLEMSABANG

Asenoki alu meranga ayimtsü tenzükd

L. Kika Pongener.

(Yashi adok nungi...)

Tanü putu nung yimden arogo aser loktiliba ajunga nung rongsen ketdangsuba mapa asadanga reprangdangra; lokti teimba ka nung ochimashi agi sunger angutsü; aser aji kechiba ta teraji kanga junga bushidanga ora; asen lima nung kibongtem teimba ka kanga sensakba agi ochimashir sudi.....Kechiaser koba lima kangasa sensaka lidir, iba lima nung nuburtemi ochishia melitettsü. Sen yong ochi ayoktsü aser supokrem tila ka nung metsüdaker alangtsü.

Tanü asenok tamangertem jenjang asadanga reprangdangra tamanger tajung aika tanü 'REVIVAL' sentep nungbo 'Kotak Tenyar' amai, ayipdena, jokdena ken anishitsü, jepa ayim-ayima sarasademtsü, temenen tatok nangzüksü, saka ano asüngbo 'Mojing' yimya dangisa meyipa orr alir...Ya kechiba?...ta shisadanga maka-mait sensak tia agi teimba nangzüka ama meliteti atsüngzüka aotsüsa akümer; kechiyong kanga sensaka maka-maitra; tiyazü jembia ochimashitsü aser auyatsüsa akümer. Anungji asenok rongsenkettsüng nung tang dang nungi jenjang tajungba kümnura, asenoki alu meranga ayimtsüla. Asenoki aseni akokba langkabosa meranga inyaksüla. Ajisuaka, aluyimba inyakyim nung ya akhi tejen putu yimya nung alu ayimba ya tera melenshitsüla lir amai ajiteter. Tekong-lu dang ayimba ya melenshir ali lenden telemok nungbo Tzü-lu ayimtsüla, aser ano asen lima tzü-mepong den apetba apir, sungjanglijang lu ayimtsüla, Alo aser Nu-lu ayimtsüla, Züngyi-Mendi-lu ayimtsüla, Bengana-Mersu-lu ayimtsüla, Azüngken, Kolar-jang aser Maha-jang-lu ayimtsüla. Shiruru mesuba 'Farm' lapoka shiruru mesutsüla, konger-lu aser akokeribo sungo-lu (Tea garden) ayimtsüla.

Asen Ao lima ongpanglen alir yimtsüngtem....Longküm yimdak Bengana pei perir, tangar danga ayoktsüsa züsenteter. Longsa yimdak Mersu pei perir, tangar danga ayoktsüsa züsenteter. Chungtia, Khensa, Aliba, Kinunger item yimtsüngtem nung Züngyi pei perir tangar danga ayoktsüsa züsenteter. Asetkong yimtsüng kar nung Mongmong yataa aji ayokba agi tajangzük aika anguba angur. Japukonglen yimtsüng kar nung Kozü-lu aser Batio-lu yima pei perir....Tzümalen lua yoka kibong mesua alir. Ano Tsürangkong yimtsüng kar nung Tzü-lu nung aroba Tsük pei perir, tangar danga jang ayoktsüsa züsenteter. Ano asen Ao lima yim kar-kar nungbo; ngisa (Rubber), tsüngyia (Akor) aser sungo-lu (Tea garden) ayimba nungi tajangzük ngua kibong mesua alir. Dimapur nung kibong aika Konger metsüba aser Naro metsüba agi kibong mesua alir. India lima nungbo aluyima linuyongjia ajakbo ali-arem peria makaba agi meyimteter, saka asenokbo ali-arem peria dang lir. Anungji asen lima tzü-mepong den apetba metsü-jang amshia alu ayimtsüla. Asenoki asen tsüraburtem ama alu meranga yimer, pei kibongbo küm nungi küm renteta tepok sunga chiyunga-jema alitsü merangdi. Aser tangar dak metaloker alitsüba sobaliba ya joko endokdi; aser mapa meranga inyaksü tenzükd; kechiaser mapa meranga inyakba nung kecha maaksu mali. Sensakeri kodanga ochi mejembitettsü; sensakeri kodanga ochishia melitettsü; sensakeri kodanga tangar o melangzüktettsü; aser sensakerji teti tangar tenzüka tangar küpok alitsü. Anungji asenoki alu meranga yima, aseni akokba mapa langkabosa meranga inyaka, takarsa makümyongjia pei kibongpo tepok sunga peria alitsü meranga inyakdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

World Relief teloki Afghanistan aser Sudan nung timtemertem yarir



September 05, 2025: Tawa Afghanistan aser Sudan na nung lendong balala nung nisung 2,000 dak tali asüba sülen lendong agi kongshirtem meyrjang aikati teyari nüngdaka aliba mapang nung Khristan melungtet telok World Relief-i linük ana nungji prokshia alirtem aser ki malirtem yaria arudar.

Afghanistan nung World Relief-i partner organization ajanga menoknok lendong agi kongshirtem yaridar. Iba linük nung menoknok lendong nung nisung 1,400 dak tali asü, meyrjang aika yiru aser aika prokshia lir.

World Relief Tir aser CEO, Myal Greene-i, item linüktem

nung nüburtemi timtem balala ajangshia lia ano tawa iba lendong nung nisung jenti asüba atema onoki jashia bilemtsür. Onoki local Arogotem aser melungsoa tenla agütsürtem den senteper timtemertem nem chiyungtsü, tejenokdak aser teyari balala agütsüdar. Tsüngrem matsüngdang meimchir ajakji senti aser wazüka ayutsü tim. Iba tangatetba nungji ajemdaker onoki teyari agütsüba maparen inyaker," ta metetdaksü.

World Relief-i X ajanga, "Item linüktem nung tzümetsüng agi gari lenmang aika ponger ogo, apu aika raksatsüogo aser nüburtem aikati teyari nüngdaker. Menoknok ajanga yimtsüng aika samatsüogo," ta metetdaksü.

Sudan nunga tzünglu kanga aruba ajanga Darfur nung anentsüh lendong atalokba nisung 1,000 dak tali süogo. World Relief-i Darfur nung

lendong agi kongshirtem nem teyari agütsüdar.

World Relief-i, "Sudan nung civil war ajanga nisung million 10.5 dak tali pei kidang nungi jenshiogo aser North Darfur nungbo ayawara tenzükogo. Iba dak alia cholera wara pokteta nisung 99,000 dak tali shirangdar," ta metetdaksü.

World Relief-i Sudan nung timtemertem nem tzü temerük den, sanitation osettsüset aser nüngdakba teyari balala agütsüdar.

World Reliefs Regional Director of International Programs aser taoba mapang Country Director for Sudan, Gemta Adula-i, "Linük ana nung ya nüburtemi odang-a timtem aika ajangshia lia ano tang tesüsa alima tzü-mopung lendong atalokba ajanga meimchirtem timtem tali bendenlokogo. Akokba tashi nisung teimtiba yaritsü atema temelunger ajak dang tenla agütsütsü mepishir," ta metetdaksü.

ANOGO ABEN TSÜNGREM DEN

Anepdang

*Anepdang ne metsüji prokang, aser nikongdang neka sota teyu. **Sayutsüngir 11: 6.***

Anepdang shia asenok asoshi anogo tasen ka tenzüker. Anogo tasen tenzükba jagi tayongzükba tasen asoshi mapang tajung agütsür. Asenok tasen tenzükshitsü, tasen ka yanglutsü aser mapang tasen ka ngudaksütsü asoshi ibai Tsüngrem inyakyim lir.

Iba tangatetba nung anepdang tasen shia jagi Khristan tamang noksa sayur. Khristan yimsü dangji " tanga mapang (chance) tajungka" yimsü ta ajatsü akok. Ibaji atangji lir. Nai kechi bilemer, nai kechi inyakaka, na koma lia liasü aser alir kecha mesükshii Tsüngremi ajak nem tatok agütsür. Asenok tasen tenzüktsü asoshi Pai longpakji aitoktsür. Tatok agütsüba nung mapang tataktet mali, mapang tajung (chance) maneni lapoktsür. Tsüngremi teti ya ashitsü renema lir."Tanaben merangang. Khrista nung Kü taochi na meketa lir. Nai tamakok manguba agi ni Na meimer masü: Ne tamakok jenti liaka Ni na meimer".

"Aibelentsüji meimchir yimya". Ya ajaki metet. Asenok kodanga tabensa masü "Tai atoktsüji Tsüngrem mapa". Ibai atangji. Pa Tsüngrem, anungji Pai idakji ajemshitsü makok. Asenok aibelen jenti liaka teti mapang tajung (chances) agüja alir".

India nung Khristantemi Tir nem temepishiba kar agütsü

September 05, 2025: Tawa Awaam Ki Awaaz telok nungi züngsemtemi ayongzüka Jantar Mantar, New Delhi nung Khristantemi ola madoki longkak aitba sülen sorkar dang linük tesem ajaklen Khristantem anema inyakba nokdangtsü atema takhangba agütsü.

August 22 nü Salma Francis, Sanjay Mcgee aser Captain Pradeep Singh nungeri Awaam Ki Awaaz kübok ayongzükba sentong nungji Punjab, Uttarakhand, Haryana, Rajasthan, Uttar Pradesh, Delhi aser Chhattisgarh state tem nungi Khristantem aikati shilem agia aden.



Jantar Mantar, New Delhi nung Khristantemi longkak aيتدang tangokba noksa nung angur.

Iba sentong nungji Pastor Ranjit Pal, advocate Shivani Masih aser Robin Masih nungera liasü.

Iba sentong nung tetushi tejaoker aser o jembirtemji Rev. Dr. Richard Howell (Principal, Caleb Institute), Catholic Archdiocese of Delhi nungi Rev. Fr. Norbert Herman, Methodist Arogo nungi Rev. Ashwani Francis aser Rev. Titu Peter na, Chhattisgarh Christian Forum Tir Arun Pannalal, Angel V Chandra, Rev Charles David, Ranjit aser Rajasthan, Punjab, aser Uttar Pradesh state tem nungi pastor tem aika liasü.

Kasa sentong nung Amritsar nungi Samuel Masih Rinku aser Haryana kübok Ambala nungi Pardeep Masih Gulati nungera liasü.

Tesünep nung longkak aitba sentong nungji Khristantemi

osangtajung kentem aten aser linük nung Khristantem anema inyakba tebilemtsü lemsatapa liasü.

O jembirtemi senso ajak kasa züngshitsü, ajak nem temeden agütsütsü, telongjem alitsü aser Khristantem den tesünep nung alitsü atema ayongzüka liasü.

Sentong ayongzükertem rongnung ka, Salma Francis-i, "Awam Ki Awaz ya yimtenren den sendaktepa aliba telok ka masü. Onok nükjidongji linük nung Khristantem anema inyakba anendaksütsü atema lir. Khristantem amakba ya onoki memelatsü. Onoki maneni ola adoktsü aser linük temzüng kübok temeden angutsü atema legal tsütsülen nungia inyaktsü," ta ashi.

Francis-isa, "Asenoki asen temeden atema ola adokbaji yimjung ajanga dang

inyaktsüla," ta ashi.

Laisa linük nung Dalit Khristantem nem Scheduled Caste jenjang magütsüba aser tribal Khristantem nem-a Scheduled Caste jenjang magütsütsü atema inyaksangshiba atema tebilemtsü akaba lemsatap.

August 20 nüa Awaam Ki Awaaz teloki linük nung Khristantem reshikangshiba osang tejangja metetdakja Tir, Droupadi Murmu nem temepishiba shidi ka agütsü.

Tir nem agütsüba shidi nungji taküm January ita nungi July ita tembang tashi nung India nung Khristantem anema inyakba tatalokba 334 metetdakja lir.

Evangelical Fellowship of India (EFI) indang Religious Liberty Commission-i talisa Uttar Pradesh aser Chhattisgarh na nung

Khristantem anema inyakba tatalokba ajak senteper 181 liasü, ta metetdaksü.

Iba dak alia Madhya Pradesh nunga Khristantem anema inyakba tatalokba 22 liasü, Bihar nung 17, Karnataka nunga 17, Rajasthan nung 15 aser Haryana nunga Khristantem anema inyakba tatalokba 15 liasü.

Parnokisa taküm February ita nung Rajasthan nung Pastor Dixon Lal aonung piyong pua yur azükba, March ita nung Chhattisgarh nung Hindu yimsü alia amangertemi Tenla ki ka amakba aser Khristantem dak azükba Tir nem metetdaksü.

Kasa shidi nungji taküm Easter Sunday nü Ahmedabad, Gujarat nung Western India Pentecostal Church nung Khristantem tekülem sentong tagidak mapang Hindu nunger telok kati Khristan 125

amokmerenba aser June ita nung Dhamtari, Chhattisgarh nung telok kati Peniel Prayer Fellowship nung tekülem sentong agirtem amakba, Laishiba aser kongki aika rongdoktsüba tatalokba metetdaksü.

Awaam Ki Awaaz telokisa India kübok state aika nung anti-conversion ozüng tim mesüi amshiba tatalokbatem metetdaksü.

July ita nunga Chhattisgarh nung Catholic nun ana den tribal lanur ka Durg railway station nung apu aser anogo aika mechioki liasü.

Awaam Ki Awaaz-i Tir, Droupadi Murmu dang Khristantem kümzüksüsa meinyaktetba atema aibelener police aser ketdangsertem nem temerenshi agüjang, ta mepishi.

Parnokisa state sorkartem dang "Freedom of Religion laws" agentsü aser tamangba yimsü temeden anema inyakba ken otem tekeraba nung angadanga obendang agütsütsü atema fast-track courts amenoktsüla, ta takhangba agütsü.

Awaam Ki Awaaz telok-i, India nung nütsüng shilem 2.3 dang Khristantem lir, ajisüaka tesüiba kümtem den medemdangra Khristantem anema inyakba tatalokbatem kanga bulua akümer, ta metetdaksü.

2024 küm kija nung India nung Khristantem anema inyakba tatalokba 640 dak tali liasü, ta parnokisa Tir nem metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tetongtar

(n) osang metetdakja jajar nisung (messenger)

* Lokti mapa inyaktsü osang tetongtar ajanga metetdakja ao.

Tetshi

(v) nisung tenüing amshia aiben jembiba (speak about particular person by name repeatedly)

* Ojalai ni menungra dang kü tenüing anogo shia tetshia jembiba.

OLONG PAITEP # 7262

1		2							3
4							5		
					6				
7			8						
9					10			11	12
13						14			
		15							

TIPILEN

- Mimong nung temaba yanglua ayuba - 7
- Tanü sür külen - 5
- Tanang masü - 4
- Bilemba atong - 6
- Tatsük-o-temokong na tsüngda - 6
- Shisadanger - 4
- Tanur aser tain tsüngda alirtem - 5
- Tejak temalen - 7

LANGTSÜNGLEN

- Nisung lutsüa jembiba - 5
- Ao limanung ayong ka - 5
- Renemer ao - 5
- Lenden masü - 5
- Tzürabur maliba tanur - 5
- O jembiba yim - 5
- Shidanga reprang - 5
- Komo adokba temaitsü - 5

OLONG PAITEP # 7261 TELANGZÜBA**TIPILEN :**

- Telok, 4. Aluru, 6. Ozüing, 8. Emk,
- Kin, 10. Teti, 12. Süir, 13. Jen,
- Ola, 16. Talak, 17. Mazük.

LANGTSÜNGLEN :

- Tenükjang, 2. Luden, 3. Kioaktsü,
- Lenti, 7. Tajangzük, 11. Teronem,
- Sempa, 13. Jahaz.

NAI-A YA METETTER MA

'Forward Bloc' : India nung aliba yimten telok ajak ka kuma longjemtsü asoshi Subhas Chandra Bose-i Congress telok toktsür May 3, 1939 küm Makur Unnao, Uttar Pradesh nungi 'Forward Bloc' tentet. Calcutta nung public rally aliba mapang, nübor tsüngdang iba telok 'Forward Bloc' tentetba sangdong. 'Forward Bloc' nung atener züngsem shia-i pei temeyong nungi agizükba azü agi sign sütep aser British yimsüsüba tsüngdang mapudaktsü mesüra meyipa maotsü ta nangzüktepa liasü.

Northeast nungi NIRF Rankings nung USTM dang züngsemer**Ri Bhoi, September 5, 2025**

(Agencies): Ministry of Education, Government of India ajanga sayaba NIRF Rankings 2025 nung University of Science and Technology Meghalaya (USTM) Top 200 universities in India (151-200 band) nung maneni züngsemba atema tanü sentong tulu ka agiogo.

Iba telemsa nung küm pezü atongtepa USTM züngsemer. USTM-i North East India nungi iba jenjang mezüng atongba dang masü saka nija university rongnunga mezüngbuba lir.

"NIRF evaluation kanga

saka agir aser reju aika rankings mejungi kumaka USTM-i national ranking nung maneni densemba atema nüma atanger" ta Chancellor Mahbulul Hoque-i ashi.

Iba sentong nung Vice Chancellor Prof. G.D. Sharma, Padma Shri Dr. Sarbeswar Sahariah, Pro Vice Chancellor aser schools, Faculties balala nungi Deans aser kaketshir 6000 tema aden.

Chancellor Hoque-isa faculty züngsem ajak sabangi aniket aser Deans, Heads of

Departments, o senior professors nem sempettem agütsü.

Iba sentong nung Registrar, USTM Anju Hazarika-i anküp tepela o jembiba tembang.

Meghalaya sorkari maneni nungita aser yaria USTM-i academic tsütsü jenjang temabai atutsü aser sangküm India nung Top 50 universities rongnung adentsü ta USTM ketdangsürtemi metetdaktsü.

Tanü USTM nung Teacher's Day-cum-NIRF benjung ya kanga dang meraketa mungogo.

Guwahati flyover yangludak tanur ka asüba atema nisung 3 apu

Guwahati, September 5, 2025 (Agencies): Guwahati nung flyover yangludak tesem ka nung arishi küm 3 tanur ka asüba atema Assam police-i private construction company ka nung director ka den mapa inyaker ana puogo.

Tanubosangji Sunit Kumar ta jangjaogo aser Bodbarnü Arya Nagar flyover yangludak 'uncovered drain' ka nung tsüka asü.

Tanubosang tebuti ken o ka benokba nung ajemdaker police-i Bhartia Infra Projects Ltd (BIPL) nem tai tongloaktsü.

"Bhartia Infra Projects Ltd (BIPL)-i mapa shitak meinyakba ajanga par jabaso

asü ta tebuti ken o benok. Iba ya civil project ka asünung onoki bushisüngdang nung shilem ka ama Public Works Department (PWD) den asüngdangtep aser nisung asem puogo" ta police ketdangsüri ashi.

Iba flyover yanglutsü atema BIPL nem contract agüja lir.

"BIPL director Avinash Bhartia, safety engineer Kaushik Gogoi aser deputy project manager Prasannajit Pathak nung puogo. Parnoki temulung magütsüba ajanga iba lendong atalok" ta ketdangsüri ashi.

Iba ken o dak sendakba nung ano nisungtem aputsü akok kechiyong CCTV footage

ajanga manholes aser drains aika menembangi aliba nguogo ta police-isa ashi.

Iba tesem nungsa tawa tu mapa inyaker ka electricity agi apuba sülen metre 500 shi lua tsükba lendong atalokogo.

"Onoki tesüiba lendong atema ken o ka benokogo. Bodbarnü atalokba sülen onoki iba ya accidental death ama mezüngshir" ta police ketdangsüri ashi.

Chief Minister Himanta Biswa Sarma-i Brihostibarnü Chief Secretary Ravi Kota dang Guwahati nung satellite survey ajanga manholes aser drains menembangi aliba asadangtsü tetuyuba agütsüogo.

SoO agreement nung lateta aliba akhümtsübuttsü: Chief Secretary**Imphal, September 5, 2025**

(Agencies): Centre, state sorkar aser telungpur teloktem den Suspension of Operation

(SoO) nung lateta aliba mapa kuma ajak inyaktsü ta Manipur Chief Secretary Puneet Kumar Goel-i tanü ashi.

Imphal nung State-Level Teachers' Day benjung amungdang Goel-i osangbener dang iba osang lemsatet.

September 4 nü tenangzüktep ka agiogo aser kobi meli mapa akümtsü ta Chief Secretary-i National Highway lapokshiba indang langzü.

Kuki Zo Council-i Meitei aser Kuki-Zo tesemtem tsüngda buffer zones akangkanga benshitsü akhangba olen ka ashidang "sorkari agreement nung lateta aliba onük ajak akhümtsübuttsü" ta Chief Secretary Goel-isa langzü.

Thailand ato kilonser inyaktsü Anutin Charnvirakul shimogo




Bangkok, Rongjui/Sept. 05 (Agencies): Hokulbarnü Thailand parliament nung ato kilonser atema vote agitepa Anutin Charnvirakul shimogo. Lower house nung Charnvirakul-i ato kilonser akumtsü atema nüngdakba vote tesadang ka dak tema ayong-ayonga angu. Iba osang züluba mapang tashi vote agüja liasü, saka Anutin-i votes 247 dak tema ngur liasü ta AFP ajanga ashi, anungji National Assembly indang lower house nung tang

temendak MPs 492 aliba nungi timbai pa yarir. Pai Chaikasem Nitisiri madak takok anguba ya tang yimsü tesüdak Pheu Thai party asoshi maksü ka lir, koba mapang ka billionaire Thaksin Shinawatra-i anir wangshi-wangshia liasü, saka pa taoba hopta Dubai-i ogo, kong küm 15 tashi 'self-imposed exile' nung liasü. June ita alliance nungi Anutin atsüngzüka aoba ajanga Pheu Thai nung mepetmesü adok, koba ajanga coalition sorkar ya

tera agi dang timba liasü. Ano taoba hopta Constitutional Court-i Thaksin'er jala Paetontarn Shinawatra atsüngdokba ajanga Pheu Thai asoshi timtem tulutiba ajuru. Shinawatra kibong nungi mesüra parnoki yariba ato kilonser mitkar mesüra okadak ajanga anentsüba Paetongtarn ya trok buba alitsü. Küm aika Thai yimtenren nung mepetmesü adoka arudang Anutin yagi tongti shilem agia liasü aser par Bhumjaithai Party ya telok ana tsüngta kanga junga nokdaktet. Arishi küm 58 tain Anutin yagi mapang ka construction firm lapoka liasü aser taoba mapang deputy premier, interior minister aser health minister inyaka liasü. Chuba yimli bhukumer Anutin ya conservative ka ama züngshir, aser pai anir Thailand nung cannabis anema takok ngua nokdaka marijuana ayoker meyrirjang aika linük nungi aridoka liasü. Parliamentary bloc tulutiba, People's Party-i Anutin yari, ajisüaka ita pezü tsüngta parliament shibanga election tasen agitsü züngzüktepa liasü.

Putin-i Ukraine nung Western security magizüker

Vladivostok, Rongjui/Sept. 05 (Agencies): Ukraine nung ceasefire tenzüker anogo ka lir Western linük temi "reassurance force" yoktsü sentong ka benoka aliba Russia Tir Vladimir Putin-i magizüker. Rara anenli ali, tzüyim mesüra anüng nung Ukraine tembar linük 26-i sepai yoka security agütsütsü mulungtepogo, ta France Tir Emmanuel Macron-i ashi. Ajisüaka pai linük 26 tenüng indang tejangja mashi. Putin-i iba sentong magizüker aser Ukraine nung sepai yokba ajunga dak tenük yoktsü, ta ashi. Taoba ita Alaska nung Putin aser US Tir Donald Trump senden amenba ajanga Ukraine Tir Volodymyr Zelenskyy den ajuruteptsü aser yimjung tezüngzüktep yanglutsü teimla liasü, saka tangbo ceasefire alitsü teimla kanga ajema lir. Hokulbarnü Putin-i Ukraine lenir den osang agiteptsü renema lir saka Ukraine nunger den tongtipang ken o kar nung agreement yanglutsü tamakoktsü lir ta ashi. Trump-i tangatettep ka ngutettsü asoshi meranga inyaker, ta pa indang odongtar Dmitry Peskov-i tenüngsang agütsü, saka European linük temi maneni raratsüsa mera agir ta aitsü. Alaska senden sülen UK aser France nati aniba "Coalition of the Willing" yagi tangatettep ka dangi arura Kyiv nem guarantees agütsütsü



asoshi meranga inyaker. Yangji Ukraine indang mitkar tashi itshitsü aser "reassurance force" agütsütsü dena lir. Front line nung masü saka tashiyim amshiba nokdangtsü atema sepaitem yoktsü, ta Macron-i ashir. "Russia den raratsü tejangraba mesüra nükjidong mali," ta pai ashi. Brehostibarnü Paris senden nung telemtetba agiba ya mera tejangja mezüngbuba lir ta Zelenskyy-i ashir. US-i tang tashi iba "reassurance force" nung shilem agitsü tejangja shia mali. France tiri asüng-yanü iba indang tatem kuma jembitsü ta ashir. US teyari ya anünglen asütsü ama tawa Trump-i ashi aser Zelenskyy-ia US lenir den

Ukraine indang anüng wazüka ayutsü asoshi jembi ta ashi. Trump-i Putin den jembishinü tajung akar aser ano jembitsü sentong lir ta ashi. Putin-ia America tir den temulungrakpoka jembishinü, ta Hokulbarnü ashi. Russia far east nung aliba Vladivostok nung economic forum ka nung tasüngdangba langzüdang, "Teti asoshi yimjung alitsü atema telemtetba ka agitsüsa kumra, Ukraine nung bendanger sepai alitsü nüngdak majiteter," ta Putin-i ashi. Teti asoshi tesunep atema telemtetba kechi agidir yangji Russia-i anidaktsü, ta pai ashi. Putin-isa Moscow nung Ukraine den senden ayongzüka amentsü renema lir aser security agütsütsü ta ashi.

LIST OF SELECTED PARTICIPANTS FOR STATE HANDLOOM EXPO AT URBAN HAAT, DIMAPUR, NAGALAND. W.E.F:- 10th SEPTEMBER TO 23rd SEPTEMBER 2025.

SL.NO	NAME OF PARTICIPANTS	ADDRESS
1	Projolita Hazarika	Jorhat, Assam
2	Mone Begum	Sibsagar, Assam
3	Muchida Begum	Nagaon, Assam
4	Gadhuli Sharma	Kamrup, Assam
5	Rituraj Saikia	Golaghat, Assam
6	Majani Khatun	Barpeta, Assam
7	M.Lia kinimi	Kolkata, West Bengal
8	Nungsangmenla	Tuli Town, Nagaland
9	Temsumongla	Chumukedima, Nagaland
10	Vinoli	Zunheboto, Nagaland
11	Arentola	Mokokchung, Nagaland
12	Ningmo Khiamniungan	Chumukedima, Nagaland
13	Botoholi	Zunheboto, Nagaland
14	Tiajungla	Mokokchung, Nagaland
15	Longdia Sangtam	Tuensang, Nagaland
16	Amen phom	Longleng, Nagaland
17	Hushika yeptho	Zunheboto, Nagaland
18	Washimenla ,Soyim SHG	Akhoya, Nagaland
19	Avole	Chumukedima, Nagaland
20	T.Tsatongla Sangtam	Kiphire, Nagaland
21	Kavitoli T Yeptho	Zunheboto, Nagaland
22	Bendangsenla	Sovima, Nagaland
23	Jungshimanen	Mongsenyimti, Nagaland
24	Kekhrietsu u Mere	Kohima, Nagaland
25	Tiala Jamir	Chumukedima, Nagaland
26	Ronsenle kent	Tseminyu, Nagaland
27	Alitola	Changtongya Yimsen, Nagaland
28	N.Apokla	Mokokchung, Nagaland
29	Kewikhuangpune	Tening, Nagaland
30	Mudouolu	Tenyiphe, Nagaland
31	N.Pongben Konyak	Chumukedima, Nagaland
32	Chubasowa	Mokokchung, Nagaland
33	Imkummenla	Mokokchung, Nagaland
34	Mughato	Zunheboto, Nagaland
35	Hekhatoli	Zunheboto, Nagaland
36	Ketoukuo-u Sote	Kohima, Nagaland
37	Tiamoa Tzudir	Mokokchung, Nagaland
38	Bendanglemla Imchen	Mokokchung, Nagaland
39	H.Ilina Sumi	Niuland, Nagaland
40	Phongam konyak K	Mon, Nagaland
41	Vilatuonuo Sote	Kohima, Nagaland
42	Merennungla	Mokokchung, Nagaland
43	Tohoni Handloom Unit	Zunheboto, Nagaland
44	Aleminla	Changtongya, Nagaland
45	Nukshimenla	Mokokchung, Nagaland
46	Abale	Peren, Nagaland
47	Sekhotolu Lohe	Phek, Nagaland
48	Lipoksola Ozukum	Toulazouma, Nagaland
49	K.Kiukhimla	Chumukedima, Nagaland
50	Bethel H Zhimo	Zunheboto, Nagaland
51	Jenele Kath	Tseminyu, Nagaland
52	Imnanungsang	Kohima, Nagaland
53	Grace kent	Kohima, Nagaland
54	Temsuchila	Mokokchung, Nagaland
55	Mughavi Y Sumi	Zunheboto, Nagaland
56	Punalemla Imchen	Mokokchung, Nagaland
57	Litimew	Kiphire, Nagaland
58	Wepe	Chumukedima, Nagaland
59	Shurhozenuo	Chumukedima, Nagaland
60	Moakum	Molungkimong, Nagaland

NB :-

- The selected participants are directed to report to the exhibition ground at Urban Haat Dimapur on 10th September 2025 at 9:00 AM.
- The participants are directed to keep their exhibits in their stall under lock & key. The office shall not be held responsible in case of any losses/theft.
- Selected participants must display genuine products with full stock, failure to do so will result in revoking their participation from the exhibition.
- Selected participants are informed to reach at scheduled time. In case of failure,their participation in the event will be revoked.

Managing Director
NHHDC LTD.

Office of the

Mongka Kin Telongjem Mokokchung

HQ: Longsa

TENÜNGSANG AGÜTSÜR

Tawa NPSC kübok NCS, NPS aser allied services tadidang nung Mongka Kin nungi Wb. Moanungsang Jamir, S/o Wb. Aochuba Jamir, pai Rural Development Department kübok BDO mapa ngutet nung, Mongka Kin-i iba takok atema Wb. Moanungsang Jamir nem tenüngsang tulu agütsür. Na ama tenendak aser tetangshi lanur ajanga kin aser yimer nem tenüngsang bener arutsüba atema pelaba metetdaksür. Tarutsü nung ano maneni ne mapa aser sempet ajanga nüngjang adoka alima ajangzükdaktsütsü yimla atar.

Tsüngremer taochi kübok ne maparen ajak nung takok ngua oangnii ta asen Mongka kin sarasadem.

Sd/-
Convenor
Maputemjen Jamir

Sd/-
Noklenrenba Jamir
Gen. Secretary

NLA Speaker Sharingain-i saisapong temaba jenjangi ajungkettsü ayongzük



Dimapur, Rongjui/Sept. 05 (TYO): The Nagaland Darts Association ajanga ayongzükba Nagaland Darts Championship tenzükba sentong September 5, 2025 nü agiba Speaker, Nagaland Legislative Assembly, Sharingain Longkumer-i moaja liasü aser Association-i state indang district ajunga nung iba asaya ajungkettsü merangba asoshi tenüngsang agütsü.

Longkumer ya The Nagaland Darts Association (NDA) indang Chief Patron lir aser iba sentong nung jembidang entrepreneurs temi yaritepba atema pelaba metetdaksü aser NDA-i saisapong yimya sübadaktsüba asoshi tenüngsang agütsü.

Association dak sempet aliba nung tamang akaba pai ashi aser ajunga dang saisapong

ajanga state terenlok alitsü asoshi shilem agitsü aser Nagaland indang lisopur maitsü wazüka ayutsü ayongzük.

Tanü tendak Nagaland indang human resources ya state alema oa tesem balala nunga meteta lir, ta pai ashi aser Association dang asayamung nung Nagaland alema oa aliba tesemtem nungia asayartem jaoknung ajungtsü, koba ajanga iba asaya aser state temaba jenjangi ajungketba kisung masü saka state nung sempet alirtem angazüktsü aser aintsü asoshi maongka angutsü, ta pai ashi.

NLA Speaker-i Viksit Bharat 2047 indang mangdang lemsatep aser iba asayamung ayongertem dang Nagaland terenlok nung shilem agia ano yimya tajungba nung sentong ayongzüktsü ashi.

Paisa sorkari state tesem balala nung saisapongtsü sempet alirtem jangjatetsü merangba indang shisem aser maongka tuluba agüja anitettsü ayongzük.

Longkumer-i iba asayamung nung shilem agirtem dang tejangraba nung bendanga agütsür asayatsü ayongzükba liasü.

Kasa sentong nung NDA tir David Angami-i NDA ajanga takok anguba aser inyakyim balala indang lemsatepa liasü. NDA ya Kohima, Dimapur aser Zunheboto nung district partners lir aser tanungba district tem nunga district partners alitsü nükjidong lir. Taküm agi iba asayamung ya 7 ben buba ayongzük alitsü, kong category balala nung shilem agir 28 lir.

US Open: Aryna Sabalenka aser Amanda Anisimova final asayatsü



New York, Rongjui/Sept. 05 (Agencies): US Open tetsür tennis asayamung final jangjaogo, koba taküm Wimbledon semifinal tanaben asayar ama asütsü.

New York nung iba asayamung final ya World number one Aryna Sabalenka aser America tsür Amanda Anisimova asayatsü.

Defending champion Sabalenka-i US Open sayamung takok marok ashitena ajungkettsü meranga Brehostibar aonung semifinal nung Jessica Pegula madak 4-6, 6-3, 6-4 agi akok.

Belarus tsür Sabalenka yagi taoba küm iba asayamung final

nung Pegula madak takok angu, aser 2014 küm Serena Williams-i Flushing Meadows nung la indang takok korang soita yutetba sülen la mezüngbuba asütsü merangtsü.

Honibar final ya arishi küm 27 tain top seed asoshi taküm Wimbledon semifinal nung Anisimova-i tsükdaktsüba tayang kepzüktsü maongka angur asütsü.

Seed ti buba nung alila Anisimova-i semifinal nung Kapan tsür Naomi Osaka madak 6-7 (4/7), 7-6 (7/3), 6-3 agi takok ngua liasü, koba Arthur Ashe Stadium nung ayatirm süya asaya.

Anisimova asoshi ibai Grand

Slam final ashitena anaben asayar asütsü, koba ita ishika jakdang lai Wimbledon title match nung takok anguba sülen alitsü.

"Ni tatem atongtsü mejangjai liasü. Akok tashi tajungtiba nung asayatsü merang. Asaya tajung liasü," ta Anisimova-i ashi.

"Ibai ni atema alima lir. Tang ni aji angatetsü meranger - ibai bongmang ka asangsang akumba lir. Champion asütsü teimla lir, saka ni final tongogo aser ni pelar."

Seed 23 buba nung alila Osaka ya 2021 küm Australian Open asayamung tanaben akokba sülen Grand Slam nung tang tajungba asaya liasü.

Asayamung tulu pezü tashi lai kokteta lir, aser tie-break nung mezüng set agiba sülen lai otsü yanglutsü amai bilema liasü. Saka Anisimova-i memulung.

Set tanabuba nunga tenaprongi kanga meranga asaya aser mezüng games trok nung breaks pezü liasü. Tie-break nung Osaka-i makok, anungji Anisimova-i maongka agi.

Iba sülen arishi küm 22 tain America tsürlai decider amokbanger asayateta liasü.

Tatemlen Osaka-i kanga meranga asaya match points ana tashi soita yutet, saka Anisimova-i maongka tasembuba nung iba asaya tembangdaksü.

NAGALAND OSANG : Tapak 1 nungi...

Nagaland nung education system...

Iba sentong nung School Education and SCERT Advisor Dr. Kekhrielhoulie Yhome-ia o jembidang "Nagaland nung shisaliokbaren melenshitsu atema tongshi asemji infrastructure, governance, aser pedagogy tajungba akümtsüla" ta ashi.

"Jila mesüra yimtsüing nung tanur shinga mezüngdoktsü atema systems yanglushir. Tanur shiai tajungtiba angutsüla aser tesayur shiai tajungtiba agütsütsü atema tashi itdaksütsüla" ta Yhome-i ashi.

State Teachers' Day benjungmung nung R. Maskui Rungsung, IFS (Consul General, CGI Vancouver) aser Department of School Education nungi tongti ketdangsurtem aden.

Iba sentong nung Nagaland nung tesayur 13 nem tetushi agüja liasü.

Sempet angurtem: K. Nzanbeni Lotha, GT *GHSS, Diphupar 'A', Chumoukedima); Avilhou Sokra, GT (PM Shri

GHSS Chumoukedima); Mary Hangsing, Teacher (Mount Mary Higher Secondary School, Chumoukedima); L. Tsulongthong, GT (GHSS Pungro, Kiphire); Shumei Antony, GT Hindi (GMS Leinak, Longleng); Rhoshutho, PT (GPS Meluri Town); Imojungla, GT (GHS Sumi, Mokokchung); Nafisa Ali, Teacher (St. Joseph's School, Mon); John Konyak, PT (GMS Shangsa, Mon); Agwamlie Poirang, GT (GHSS Peren); Dr. Bijay Kumar Mishra, PGT (GHSS Phek); M. Chibeni Humtsoe, GT (PM Shri GMS Wokha Town-A); aser M. Samuel Sema, GT (GHSS Satakha, Zunheboto).

Sentong nungsa Government Middle School Dobagaon; GMS Naga New Model Sumi; St. Joseph School Tuensang aser The Vineyard Kohima nem Award for Excellence in School Safety Policy Compliance agütsü.

Badminton World Sr Championship nung Bendang Jamir-i shilem agitsü



Dimapur, Rongjui/Sept. 05 (TYO): Mokokchung district kübok Mopungchuket yimtsüing nungi Bendang Jamir (Bendangnukshi)-i India tenüing nung Badminton World Senior Championship nung 70+ age category nung shilem agitsü, koba Badminton World Federation (BWF) ajanga ayongzük. Iba asayamung ya Pattaya, Thailand nung September 7-14, 2025 anogotem alitsü.

Arishi küm 80 tain Bendang Jamir ya India nung saisapong nung tejangja nübu ka lir. Asayar tejen, Jamir ya taoba mapang Ankara (Turkey) aser Jeonju (South Korea) nung World Senior Championships nunga shilem agia lir aser international aser national veteran tournaments nunga Indian team nungi teti shilem agia arur.

Taküm Goa nung Indian Masters National Badminton Championship nunga pai 70+ category nung tasembuba jenjang

nguteta liasü.

Mezüngbo pa badminton masü football asaya tenzük. 1968 küm Government High School Mokokchung team nung pa dena liasü, aser parnoki New Delhi nung Subroto Mukherjee Cup Football Tournament nung runners-up jenjang angu.

Iba sülen 1974 küm North-Eastern Hill University (NEHU) tenüing nung mezüngbuba football team nunga pa captain liasü.

Badminton asayaba dak alaka pa aluyimba aser nübur asoshi maparen balala nunga shilem tajung agir. Pa ya Nagaland Registered Class-1 Contractors Union (NGRC-1CU) nunga Advisor ka ama lir.

Asür Sobulepden aser Asür Chubasenla na jabaso Bendang Jamir ya NEHU, Shillong nungi B.A azüing aser tang Dimapur nung alir. Pa Helena Aier den kibong akum aser tanur ana tebu aser semchir pezü lir.

BILEMDANGANG

"Aseni magizük tashi aseni kecha memelenshitet."